

欽
定
全
唐
文

欽定全唐文卷五百九目錄

權德輿 二十七

祭建昌崔丞文

祭徐給事文

祭奚吏部文

祭盧華州文

祭房州崔使君文

祭戶部崔侍郎文

祭楊校書文

祭獨孤常州文

祭唐評事文

祭獨孤台州文

祭張工部文

祭賈魏公文

祭唐舍人文

祭崔士曹文

祭杜岐公文

祭子壻獨孤少監文

祭孫男法延師文

祭外姑河東縣君文

祭楊校書夫人文

祭外孫女文

欽定全唐文卷五百九

權德輿 二十七

祭建昌崔丞文

維貞元十一年歲次乙亥十月朔日姪女壻起居舍人知制誥權某謹以清酌庶羞之奠敬祭於故洪州建昌縣丞崔六伯之靈伏惟北州茂族中庸令人行有枝葉道無緇磷居常葆和動不違仁素履坦坦閨門申申子真恬退張仲孝友淡而不厭晦而能久亦既再命皆以退聞天爵之外視如浮雲謝病郊園深辭世紛運多芝朮家有典墳心

遊杳冥手植芬氲行樂春晚開襟目矐謬忝嘉姻獲奉深
分曩時上策旅食江郡一葦可航百里而近長筵式宴虛
室清論少長無違琴觴迭進仰名教之可樂見義方之善
訓暇日則多窮年無悶不耗天理同乎大順頃服朝命言
旋帝鄉盡室出祖至於朱方離居未幾四換炎涼凶訃忽
來哀何可忘山川阻遠情禮未展犯塗潦以無由想音徽
而在眼敬姜知禮鯉也聞詩昔著婦行今推母儀婉彼令
姪承哀涕洟遠切諸孤之痛難追世父之慈有生必化從
古同轍元酒清滌用申永訣寄懷斯文於彼臨穴

祭徐給事文

維貞元十四年歲次戊寅八月戊寅朔十日丁亥右諫議大夫裴佶中書舍人翰林學士吳通微中書舍人高郢尚書司勳郎中知制誥權某尚書司勳員外郎知制誥翰林學士鄭絪起居郎韋丹左補闕翰林學士衛次公右補闕王紆右拾遺史館修撰蔣武等謹以清酌庶羞之奠敬祭於故給事中贈禮部尚書徐公之靈太伯延陵化於東吳遺風禮讓乃有名儒懿懿夫君文誼是圖早歲清名輝動江湖遐覽古音琢磨無斁以五常爲師味六學之蹟始以

處士交馳府辟乃考祕文諸生表的周畿結綬吏隱方適
三命登朝禮文損益旣肄業以綿蕝亦說經而重席踐履
中臺翻飛左掖含章載筆侍講通籍循性不遷虛中靜專
馭議清禁於茲八年同官爲僚惠好歡然瑣圍密近蘭室
周旋分曹直夜接武朝天會清機於妙理每捨筏以忘筌
如何移疾亦旣旬日謂勿藥之有喜俄交臂而相失死生
同途力命難俱焜耀終始恩深禮殊榮春官於夜壑振簫
鼓於塗芻平昔談笑倏然虛無含悽寄詞絮酒焚枯願執
紼以莫尋奠靈筵而涕濡尚饗

祭奚吏部文

維貞元十五年歲次己卯十二月庚午朔二十六日乙未
右諫議大夫裴佖給事中許孟容李元素陳元中書舍人
高郢權德輿兵部員外郎知制誥崔邠等謹以清酌庶羞
之奠敬祭於故吏部侍郎贈禮部尚書奚公之靈竹箭有
筠黃裳有文惟公實然早播清芬射策筮仕鬱然令聞
飛迅颺凌厲層雲乃踐清近時登傑雋選當視草中亦難
進南宮西掖砥礪鉅刃奏議練於程品贊書稽乎典訓貳
職司寇時惟欽慎獄有煩言訟公卽訊惟直是從確然蹈

中雖申申以詈予終蹇蹇而匪躬五歲啟事九流承風寬
以有制峻而能通宜躋大年以至宗公絕足方騁修途忽
窮佶等或早陪交好或嘗接官命懷鮑叔之深知仰晏嬰
之久敬里第方葺蘭萱滿逕平日徽音未移視聽乃者寢
疾猶期善慶孰謂旬時奄然大病上軫宸衷榮加飾終題
劍告第恩殊禮崇吁嗟祖載去此昭代儼丹旄以就途紛
素車而來會晤言如在神鑒豈昧何以洩哀寄茲一酌尚
饗

祭盧華州文

維貞元十六年歲次庚辰四月己巳朔越八日景子從表
弟朝議郎守中書舍人雲騎尉賜緋魚袋權德輿謹遣使
以清酌時羞之奠敬祭於故華州刺史御史大夫盧六兄
之靈詩謂君子溫其如玉書稱正人既富方穀明靈比德
清議所屬未極全才如何不淑追憶曩歲鍾陵嘉招兄時
左遷屈佐乘輅幕庭山郭並榻連鑣心同則親敢曰嘗寮
俄奏郡課復升郎位左掖斯密教官已貴殘骸被病土梗
蓬累謝交辟以未能方屏居以自遂拔茅推轂遐蹈古義
七發粲然八行狎至詔下江干猥登禮官顧蓬茨之鮪生

忽東帶於朝端暇日良夜清言舊歡再披雲霧永契金蘭
帝念長人出臨左輔河潼襟要復此居部乃亞丞相金龜
映組美利休聲和風甘雨弱植何幸累叨禁垣諫曹右史
以至司言因緣踐履根本推援恐累知人上負明恩一違
晤語九變涼溫日夕音徽切劘討論發函疊疊如見君子
或忠言以規過亦善謔而溢美冀登柄用以永介祉每驤
首於公朝期盍簪於仁里俄驚感疾方俟有喜志切乞身
恩深卧理神道與善胡然不起寢門一哀孰甚知已素車
莫遂雪涕何已樽酒簋貳深誠在此尚饗

祭房州崔使君文

維貞元十七年歲次辛巳十一月己未朔十日戊辰姪女
壻朝議郎守中書舍人賜緋魚袋權某謹以清酌庶羞之
奠敬祭於故房州崔十一叔之靈荆藍之下必產貞玉有
斐君子生於茂族信以發志居惟慎獨時然後言言必可
復昔未弱冠皦然清規已結黃綬分曹帝畿亦宰一同邑
人熙熙有翹者車辟禮交馳乃簪神羊在壽之陽俄佩赤
紱贊於熊相尋副戎車再遷直指守臣進律公亦戾止著
作中祕古之外史章奏文昌虞衡允理吏二千石風化攸

興朱輜赤帷來惠房陵饋軍禦寇徵令重仍恭敬不諼秉
持有恒六年刺舉千里清澄凡此下人時公之能昔惟觀
止倏焉二紀道信部以交歡寓揚都而宴喜袞袞清義怡
怡致美亦旣納徵願言未幾悼子咸以作賦感東武而成
誅繫援凋落惟公是已方歎分符又悲閔水昔年委質於
汴之東從事則異嘉招實同頃忝右掖獲辭南宮或方駕
於辨色或開襟於退公華燭以嬉芳罇不同乍詠庭中之
雪每歡林下之風千騎雖遠雙魚屢通永懷休沐若去池
籠顧此室內二年沈痾方書藥石纖悉誠誨精微析理款

曲深愛迎門發函俯仰是佩幸積恙之小閒冀異時之良
會如何奄忽永謝昭代哀以慈結情逾禮外對茲悽酸心
骨如碎中饋仁賢諸孤斬然充窮卽遠誠信歸全萬事如
昨音容冥漠薤晞朝露舟失夜壑鮮原喬木遵彼東洛若
堂若坊先子所託目想如在心懷可作神其格思歆此單
酌尚饗

祭戶部崔侍郎文

維貞元十九年歲次癸未十月戊寅朔十二日己丑中書
舍人楊於陵禮部侍郎權德輿謹以清酌庶羞之奠敬祭

於故戶部侍郎贈右散騎常侍崔君之靈古之大觀推理以達謂生爲勞於化不怛苟非至人哀樂云云一欣一感松茂芝焚遐想深契在於夫君素履無玷黃中有文卓爾堅明皦然貞醇夙以聲實邁於羣倫伊昔宦游風塵不雜聯簪法冠並列賓榻夷道可久淡交相合亦旣府除索然離居或憩循江或旋練湖君初卷懷寓彼羣舒三四年閒聯奉詔書分曹士師議禮太一作予中臺奏議並列哀烏道舊放懷話言于于三登首曹乃貳司徒相顧飛翻接影天衢顯允德業大僚是都凡我四人交歡靡渝直諒是程

中庸是經或會公朝猶疑幕庭孰謂夫子奄然冥冥交臂
相失汎瀾涕零入室噉噉孀孤之聲追懷悼心痛我友生
密印左貂以哀以榮嗚呼哀哉命之所賦豈有其數乃如
之人洵美無度常日謂我文昌聯步如何今茲已隔泉路
疊疊良話依依平素晦明再葢冥漠大暮萬事風燭九泉
草露魂之來兮歆此薄具尚饗

祭楊校書文

維貞元二十年歲次甲申云云故校書楊君幼樞之靈大
玉天球不磨不礪清廟黃目森然禮容先正司徒德與位

崇恬然清靜以厚時風幼樞嗣之天授全識日新不怠能
世其德亦旣弱冠聲猶四塞瓊樹一枝鳳姿五色登名太
常芸閣爲郎首大府之嘉命專中軍之奏章目成清冥足
跋康莊期元成於必復知公業之不亡猥以蒙瑣辱當親
姬嘉禮用時歡言卜夜追惟世好交契逾深自爲聲譽豈
止潘任日聞清機灑我煩襟彼松茂以蘭臭諒二人之同
心常謂予曰居中用晦明道若昧姑務其實姑修其內名
浮於行所以賈害直諒之詞迭承規誨清和之月邗溝分
袂閒茲一水使我心痾曠懷勝理緘封相繼不聞移疾奄

此下世泣讀訃書百骸如碎寢門一痛素車來會觀聽未
移音容如對如何返真迫此短辰書有遺草弔無雜賓塗
芻在御嘉耦方妊護喪晝哭反葬咸秦驗熊羆之吉兆償
世祀之悠久儼書籍以具存傳義方於身後嗚呼哀哉或
仁而夭或鄙而壽彼蒼者何難以理究顏生短命叔寶多
病奈何賢達古今不幸大鈞茫茫死生其常痛我幼樞二
紀而亡嚴霜夏隕零落貞芳嚮用五福何人則當寫懷寄
誠在此一觴哀從中來雪涕浪浪尚饗

祭獨孤常州文

維貞元二十年歲次甲申十一月戊申朔禮部侍郎權德
輿謹以清酌庶羞之奠敬祭於故常州刺史獨孤憲公十
四丈之靈嗚呼德充而位不配才大而年不遐稽於賦命
從古太息伏惟蘊大雅之愷悌遵六二之直方作爲文章
律度當世燦如日星炳若龜龍施於政事表率萬國三郡
洽和四萬鼓舞而不得宏大志業歿於中年豈洪鈞造物
使才命相鑿先師罕言末如之何伏以夫子篤忘形之契
小人展無容之敬去世二紀清風凜然顧以息女歸公愛
子雖不獲逮事而備承家法况茲菲薄實忝眷私辨方之

年違難於江徼志學之歲伏謁於郡齋典司禮職嘗奉易
名之議嚮仰德門今承合姓之重話言誘掖造次敢忘德
容碩姿髣髴在目自爲聲舉之舊今則潘楊之歡二孤純
孝遺烈鍾美鮮原改卜日月有時酒殽靜嘉式薦靈位尚
饗

祭唐評事文

維貞元二十年歲次甲申十一月壬戌十六日癸亥禮部
侍郎權某云云故大理評事唐君之靈昔與之子江湖觀
止伯仲怡怡含章致美麗則拔俗清言會理策名東堂交

辟知己始賓岐陽爰佐景通四名安卑虛懷蹈中朝多薦
延方俟至公才則有裕命胡不融自展嘉姻纔逾半歲索
居大半書札相繼北自鄜時南遵白帝巴峽泝沿風波迢
遞反駕京轍遄嬰病癘旬朔之間奄然下世自古哲賢或
非大年吁嗟嘉言今亦已焉噉噉孤嗣窮訴彼天舊篋遺
草深交絕絃室有才淑含酸晝哭靈輜就路遺允在腹冀
協熊羆次昌嗣續波奔塗潦悽悽風燭顧女弟以增欷想
斯人之不復白馬素車寒原夏屋奠觴雪涕逆此瞑目尚

饗

奠敬祭於故司空相國贈太傅魏國賈公之靈覆載之間
肖形必化惟令德淑問與天壤俱存伏惟以含一之量叶
休嘉之運四征授律勲在盟府二揆居中勤宣宰政注意
體國繫公是圖始自黃綬至於元袞率由坦夷以極光大
浩若溟海熙如春臺歸全之日朝野相弔窮琬戈金鉉之
寵可以言貴過懸車貳膳之年可以言壽中和博大之度
可以言君子知命順化之理可以言至人三朝告老終不
得請法賻弔祠禮加常數鄙薄無似辱公之知擢進切劘
逮茲一紀獲居里閭亟踐堂奧拔俗之韻忘年之歡疑在

視聽忽成今古嗚呼魏公可勝慟耶潔此觴豆奠於冥漠
髣髴風采公其降靈尚饗

祭唐舍人文

維元和元年歲次景戌正月景寅朔十九日甲申戶部侍郎
權德輿謹以清酌時羞之奠敬祭於故禮部郎中知制誥
唐君之靈嗚呼文編行茂才全弱冠知名時推雋賢舍
章振藻金石在懸緣情放言采組相鮮憶昔淮湖與君觀
止忘形合志造適通理瓜步邗溝吳山楚水芝蘭之室三
十年矣君自左史進居臺郎子叨禮官亦忝周行熙春至

止休沐相將纔盡簪於上國俄出守於遐方盛山雲安風
水迢遞屈此二郡俄然半世文章煥發書札相繼辛酸苦
言款曲嘉惠顧我忝曠愧君淪滯屢封薦章輒以人廢每
與公範交修宿契不進不止中心自誓大君繼明元凱持
衡方開宣室以待賈生裁成訓命所謂文柄詔君居之士
友相慶遲遲征軒來自荆門凡我同人載勞夢魂屈指繼
日俟君西垣不及百里俄歸九原嗚呼文編此痛難言壽
堂野土一別終古平昔風姿杳無處所樽酒簋貳涕零如
雨冥漠之閒神其聽否尚饗

祭崔士曹文

維元和八年歲次癸巳二月朔日禮部尚書權某云云故
京兆府士曹崔君之靈嗚呼相門令嗣被服大義青衿肄
業黑衣入侍贊佐征師參榮臺寺職列京掾年纔強仕謂
登公朝稍進名器層雲未翦迅翼俄墜惟先穆公左官江
干一言營道二姓交歡信郡觀止君初邕角揚都會合甫
過幼學自至京轂相傳博約永言舊知敢忘先託常曰繫
援內惟菲薄缺然深哀猶負前諾力命乖戾英華銷鑠方
馳康莊已歎冥漠長女未笄幼男孩提披披靈衣嗷嗷孀

妻緱原大墓祖載東祔瞻言體魄歸此壤樹顧我室人沈
痾積年四支半廢雙足不前常痛終鮮况茲歸全氣息纔
屬形神惛然哭不爲位哀不成禮臥牀宛轉如刀集體祔
輶曉發銘旌前啟魂無不之歆此牢醴尚饗

祭杜岐公文

維元和八年歲次癸巳三月甲寅朔二十八日辛巳禮部
尚書權德輿謹以清酌庶羞之奠敬祭於故太保贈太傅
岐國公之靈伏惟體溫厚之氣協休和之運五常用仁九
德在寬六朝揚厯三后公相契作司徒薨居太保致位遂

志晏閑顯尊極人倫之壽寵備君上之恩禮傳曰行道有福詩曰求福不回考祥視履惟公是已至若徜徉化元保合太和扶道嘉會將明利澤漸漬於生民而隱於視聽者可勝道哉早辱招辟仕纔初命頃沐鴻休職聯大任周旋惠愛三十餘年公府閣議郊居盛集滄溟沃日之量清廟禮神之器四教五福明哲始終話言風采疑在夢想變化糾紛何可勝論常日賓榻今茲靈位常日歡言今茲聲淚常日精爽今茲魂氣常日鳴騶今茲騎吹永去昭代言歸厚地平生一樽拜奠歔歔尚饗

祭子壻獨孤少監文

維元和十年歲次乙未四月壬寅朔六日丁未外舅太常卿權某敬以清酌時羞之奠致祭於故祕書少監贈絳州刺史獨孤郎之靈噫嘻大鈞生死沕沕壽夭紛綸古人罕言豈造化流形不與其全或一氣滑湑偶然而然嗟我子壻時之令德自誠而明必協於極前殿大對諫垣正色中臺有聲東觀以直訓辭溫雅視草宥密當時之選必居第一玉立皦然古之淵騫抗詞犯顏勇若諸賁立不易方卽之也溫道乃前定實安於仁時惟憲公先友是敦旣以聲

子之舊復茲戴侯之親歡言戾止十五年矣始遇弱冠今纔強仕會朝方駕居室同里愛我以德忠言在耳勞績盡瘁疾嬰媵理乞身上言移亞外史謝絕人寰屏居鄠田冀此宴閑百疴就痊神理曖昧晦明纏綿勿藥難徵驅車言旋吁嗟風燭糾纏倚伏涉路猶理入門而復親賓恒化里閨行哭如何斯人奄忽不淑物情所望必至宰匠惟君知臣注意寅亮時因劇切然後交鬯動於險中終不委讓徹瑟之辰萬情百身孤孀嗷號所不忍聞念以蒙稚孝思天至禮逾成人哀感異類昔謂福善今疑報施臧孫有後惟

此可冀翻翻素旌東指鼎成鮮原夜壑密印芻靈總衰已
除服紀大輕如何此禮不稱予情薤歌楚挽一往不返哲
兄襄事茹痛終鮮送爾冥漠顧予衰蹇悲哀所鍾賢達未
免寓形必化何早何晚雖以懷終不能自遣淚盡彌苦魂
交可展奠茲一觴臨訣先遠尚饗

祭孫男法延師文

維元和十二年歲次丁酉五月庚申朔十三日壬申翁翁
婆婆以乳菓之奠致祭於九歲孫男法延師之靈爾之敏
悟爾之孝愛纔至齟齬已能知書倦息猶在於文字嬉遊

不離於硯席其姿狀有外祖河南之風懿茲夙成必謂致
遠疾瘍所遘醫禱無瘳竟罹夭枉痛切心骨况自二歲三
哭殤孫逝者日遠存者無幾吾以衰年多病支體不隨爾
父在京不見其絕痛爾櫛櫝歸遵畏塗今日哀懷尤倍常
理頃者求拔苦海依歸度門故於斂襲率以緇褐今之祖
奠靡設羶腥苦痛之深遣割不去臨路長痛嗚呼奈何

祭外姑河東縣君文

維貞元十一年歲次乙亥十月朔日子壻起居舍人知制
誥權某謹以清酌庶羞之奠敬祭於外姑故河東縣君之

靈伏惟承積德之慶稟醇仁之性嬪於盛門播此淑行恭
聞幼儀以及結褵居然綢直不待姆師朝尊相府家榮命
婦琴瑟和聲珩璜節度執謙處約不改其素專靜是宏紛
華靡務四德日滋六姻是宜睦親以誠撫下以慈內則之
禮采蘋之詩夙夜無違如春熙熙道備移天哀纏晝哭閨
門之訓斷織是勗期於榮養以俟豐祿方慶綵衣遽驚喪
服顧惟鄙人辱奉嘉姻十年之間情以理親頃歲違阻遐
方食貧殘生未減慰訓相循俄忝周行來歸帝里驅車遄
邁盡室至止舉觴爲壽侍坐以齒令節游娛溫顏燕喜浮

生如幻寢疾未幾遽此全歸難徵神理樂樂棘人泣奉塗
芻翩翩素旌東指洛都征途在目官局所拘含淒國門拜
奠路隅仁愛如昨幽明忽殊托詞寫哀庶達泉壚尚饗

祭楊校書夫人文

維元和三年歲次戊子三月癸未朔二十五日丁未妹壻
太中大夫守尚書兵部侍郎上柱國襄武縣開國侯權某
云云故校書郎楊君夫人一姊之靈先姊先舅公台積厚
德門交輝士女挺秀有儀有耀宜貴宜壽纔移所天俄哭
於晝遠護帷裳來歸帝鄉灑埽壤樹深羞蒸嘗之死之誓

炯然秋霜二十年閒形同未亡乃育孤女是歸良匹亦既有行秀而不實感念難遣哀酸成疾晦明推移變化奄忽昔與幼樞姻聯揚都歲時二紀人事萬殊諒勞生於此世何怛化之同途彼福善與貽慶又不知夫神理之有無顧我好仇永懷伊姊動若形影痛深骨髓芻靈就列送奠停軌觴酒寫哀神其聽此尚饗

祭外孫女文

維元和十二年歲次丁酉六月己未朔十二日庚午外翁婆以清酌庶羞之奠致祭於獨孤氏孫女妹妹之靈吾殘

生衰苦殃禍相循四年已來七遘傷悼今日之痛情又倍
常以前年再丁齊斬意其孤苦備極或保安全神理謂何
又茲天闕自嬰羸恙雖未痊除而神用精明不減平日昨
以晦朔歸奉几筵信宿之間幽明已隔犇告惝恍如狂如
癡呼天不聞此痛何極況今冬除禪來歲初筭方擇良對
以圖先近豈吾之薄祐有忤神明復爾之稟命不可踰越
理遣不去情鍾奈何吾家壤樹宛在伊洛今爾體魄歸祔
壽安吾多病蕭然義期可見生也死也如環斯循倘冥冥
有知冀與爾爲泉壤鄉黨瀝酒申訣嗚呼痛深尚饗

欽定全唐文卷五百十目錄

陸長源

僧常滿智真等於倡家飲酒烹宰雞鵝判

斷金華觀道士盛若虛判

上宰相書

嵩山會善寺戒壇記

唐東陽令戴公去思頌

唐故靈泉寺元林禪師神道碑

并序

華陽三洞景昭大法師碑

戴叔倫

賀平賊赦表

意林序

李方郁

修中嶽廟記

欽定全唐文卷五百十

陸長源

長源字泳之吳人歷汝州刺史貞元十二年檢校禮部尚書爲宣武軍行軍司馬以峻法繩下節度使董晉卒長源知留後爲兵士所殺贈尚書左僕射

僧常滿智真等於倡家飲酒烹宰雞鵝判

且口說如來之教在處貪財身著無垢之衣終朝食肉苦行未同迦葉自謂頭陀神通何有淨名入諸淫舍犯爾嚴戒黷我明刑

斷金華觀道士盛若虛判

本是樵童牧豎偶然戴幘依師不游元牝之門莫鑒丹田
之義早聞僭犯苟乃包容作孽旣多爲弊斯久常住錢穀
惟貯私家三盞香燈不修數夕至於婢僕遍結親情良賤
不分兒女盈室行齊犬馬義悖清廉恣伊非類之徒負我
無爲之教貸其死狀尚任生全量決二十便勒出院別召
精潔玉守務在焚修

上宰相書

月日太中大夫守汝州刺史兼御史中丞本州防禦使陸

長源謹奉書相國閣下相公以命世之畧應佐時之器發
文苑之鴻猷繼台庭之盛業聖上傾心以待相公之啟沃
天下側耳以待相公之政理豈得與房杜異日而不與蘇
宋同年哉某比在朝廷接君子之步武聽哲人之語言區
區之誠願盡於此今上聰明英武自漢魏以來賢君哲后
未有如今上者自臨極以來宰相未有如房杜蘇宋者何
偶聖之有期而得賢之無路蓋有以也夫誠人之失亦由
端其躬而後求影之直故宰相者導生人之本稽政化之
源正辭以固之平氣以待之物有其官官得其人則提綱

而網目張振領而毛裘舉至如移制度平軍國事關社稷者斯在宸衷猶望宰相自古況今獻可替否其餘朝廷之常典羣司之闕務弛張由於下筆指顧在於一言使政歸常典理革前弊和氣浹於下清風穆於上自然宰輔之事行弼諧之義暢何必捨其易而攻其難犯龍鱗之不測蹈虎尾而莫顧哉其宰相之寄也在於用賢賢不濫而人自理次於秉政政不撓而國自安用賢者除改是也秉政者賞罰是也其用賢也絕黨與捨憎嫌使韋弦各施輪轅適用頃者之用人也聲利以撓其心愛惡而昏其識以枉爲

直破觚爲圓除改出於門庭賞罰隨其情欲求道行事舉其可得乎且尚書六司天下之理本兵部無戎帳戶部無版圖虞水不管山川金倉不司錢穀光祿不供酒衛尉不供幕祕書不校勘著作不修撰官曹虛設祿俸枉請計考者假而爲資養聲者籍而爲地一隅如是諸司悉然欲求網目張裘毛舉其可得乎此宰相之職也且棟傾者正之則屋無壓焉之懼疾甚者攻之則人無侵疹之患正傾在於良匠攻疾在於良醫故政化失諫臣得抗疏以論之敗累興憲官得持法而繩之諫臣須謇謇匪躬之士憲官須

孜孜嫉惡之人今悉求溫潤美秀沈默宏寬者爲之蓋北
轅適楚圓鑿方枘欲求扶傾愈疾其可得乎貞元初兵戈
初解蝗旱爲災邑多逃亡人士殍餒至使官廚有闕國用
增艱王制曰國無九年之蓄曰不足無六年之蓄曰急無
三年之蓄曰國非其國也三年耕必有一年之食九年耕
必有三年之食以三十年之通雖有凶旱水溢民無菜色
然後天子之食日舉以樂今歲豐年稔穀賤傷農誠宜出
價以斂糴實太倉之儲豈可慢易於豐賤之日危急於凶
荒之際比年國家和糴殆不得人文帳空存倉廩不實是

由賞罰之典曠姦濫之吏生此亦宰相擇人之過也某之州戶口減一萬兵數無二千夏率供秋秋率供夏儻四氣或爽一歲無年實恐投姦有虞爲累非淺况率土州縣其事畧同古人云旱則資舟雖在豐稔之時須爲凶險之備此亦宰相之職也蝗旱之時聖上憂畿縣凋瘵親擇臺省十人出爲畿令其後京畿稍理皆擢以大郡則聖上旌賢賞功之意也頃來度支敕符皆云刺史縣令以戶口減殿一人賦斂增最一人與者騫騰於廊廟嫌者沈淪於草莽欲求其爲惡者懼爲善者勸其可得乎此宰相之職也况

今北虜和親縻費轉甚西戎作梗邊鄙未安所望求方召之才選甘傅之將聯營朔裔復河外之城振旅湟中收隴右之地且田單匹夫也敗樂毅乘勝之師謝艾書生也破麻秋勁銳之卒豈有其時而無其人哉在用與不用耳此亦宰相之職也太宗得房杜貞觀之政成元宗得蘇宋開元之業泰今相公居廟堂之上當台衮之任與房杜蘇宋列於青史寧肯昵親愛行肺腑踵覆車之轍哉某齒髮向衰志力猶在遇賢相逢明時亦願一豁平生少展微分不然者老於泉石亦求仁而得仁某再拜

嵩山會善寺戒壇記

嵩高得天下之中也所謂名山福地異人靈跡往往而有
漢晉間高僧植貝多子於西峯一年三花因爲浮圖遂爲
寰中之真境又有兩阜中斷豁爲石門飛流縈回以噴薄
喬木森竦以布護先是有高僧元同律師一行禪師鑿林
崖之欹傾填乳竇之窸窳甃玉立殿結瓊構廊旃檀爲香
林琉璃爲寶地遂置五佛正思惟戒壇思惟者以佛在貝
多樹下思惟因名貝多爲思惟卽三花之義在此自河洛
煙塵塔廟崩褫上都安國寺臨壇大德乘如修慈業廣乘

律道尊志度有緣法庇羣動慨茲堙墜遂爲聞徹尋有詔
申命安國寺上座藏用聖善寺大德行嚴會善寺大德靈
珍惠海等住持每年建方等道場四時講律藏用上人逸
躅徧尋高情獨邁美殿塔之嚴麗賞泉石之勝絕其跡不
朽其教益宏於是鐘梵相聞幡蓋交蔭豈獨鑪峯名嶽空
記遠公之行沃洲精舍重述道林之跡時貞元十一祀龍
集乙亥大火西流之月也

唐東陽令戴公去思頌

建中元祀皇上新景命將致天下於仁壽之域以兵革盜

關一 間閭關二 前關一 之關一 猶軫關三 延度求俾又夏

五月壬辰詔書以監察御史裏行戴叔倫為東陽令關三

也關六 之閒城畫野婺女以東陽為劇先是山寇關二 邑

人關二 田關二 萊人關十 路關一 聲關一 之以信緩其賦

使其人舒平其役使其人勸由是田關十 使有關一 農人

或惰業關一 廬廢樹障公關防徵綃斂縞無以供關七 以

公關一 之以勤關二 使澤有浸由是桑柘茂隄塘修

平林接陰大壑含潤室有關一 而關二 人無關一 而有關七

者困於兼并完聚者苦於剽掠公董之以灋容之以關四

次定全書文 卷五百十 陸長源 六

字使之如闕一字然人懷日出之謠犬闕一字一夜吠之警政化

之闕九字貨賄闕一字聚公闕八字庭無事留物不易肆鞠茂草

於囹圄闕二字財於闕一字問公字幼公本譙國人也闕九字仕

之日履官之秋唯闕一字問闕十之一字之闕十字莫不負弩先驅包

茅爭入闕二字專百里之命化一邑之人闕二字割雞闕四字夫

字闕七以親也權豪除盜賊屏教之以讓也鬪訟止商旅至

教之以和也闕三字帑藏之闕八字之事傳於郡國謳誦之聲

聞於里巷且藉闕三字人不偷闕十字阜於下副明主闕一字勞

之求成蒼生已安之業闕四字伏闕八字州之闕六字輔之才必

資於卓茂豈惟執憲殿內

闕三字

中而已

闕六字

等

闕十

盧清

等一邑之彥也里正王丞

闕一字

厲曰家等十室之賢也及

百姓徐文

闕三字

等皆

闕六字

逾忠良宰范陽盧公曰信以才

望蹈公之遐躅以政事

闕一字

公之令猷與丞

闕一字

樂

闕八

太尉河南豆盧岫尉隴西李惟清

闕一字

古立則

闕二十

之

遺愛其辭曰

惟聖作乂其運克昌化

闕五字

賢良申命於

闕一字

令乎東陽

闕六字

斂重人散

闕二字

公既賢舉亦以名揚簡以

闕一字

下信

以任

闕十

樹

闕六

路絕豺狼折獄止訟聚貨通商其俗則

泰其人則闕十洋洋挹而彌廣久而愈芳巖巖貞石休有

烈光

唐故靈泉寺元林禪師神道碑

并序

法本無生之謂真心因不染之謂寂執有求真之謂著體
真歸寂之謂如非夫善發惠源深窮定窟何足以大明觀
行獨秉禪宗使定惠兼修空有俱遣道流東夏聖濟北山
哉禪師諱元林堯城人也俗姓路氏黃帝之後封於路國
因而爲氏捕虜將軍端見僞後燕錄豫州刺史永出晉中
興書邁種於人嗣有明德禪師襟靈爽岸神氣儻遠生而

克岐弱不好弄初遊神書府精意儒術覩百氏之奧窮九
流之源平叔之疑義兩存康成之未詳多闕莫不窮蹟至
妙剖析元理渙若冰釋朗然雲開並如枝拒蹶張步騎彈
射人則曠劫藝皆絕倫後讀阿毗曇藏遂發心入道依龍
興寺解律師學業依年受具隸居靈泉佛寺摳衣之歲惠
遠卽風雅書生落髮之年道融乃聰明釋子以戒爲行本
經是佛緣雅閑持犯克傳祕密學者號爲律虎時人目爲
義龍推步渾儀昭明厯象天竺跋陀之妙沙門法願之能
道契生知理符神授旣習空觀遂得真如身常出塵心則

離念將在此以超彼不自利以利他不來相而來不見相
而見焚天香以崇發宏願鳴法鼓以召集有緣聲振兩河
教被千里樹林水鳥竹葦稻麻願結道緣爭味禪悅雖先
生槐市夫子杏壇攝齊之徒未足爲喻於是廣度羣有大
庇庶情應悟攝心隨分獲益大雲含潤草木無幽而不芳
明鏡懸空妍蚩有形而各兆嘗至城邑因過巷肆屠說停
刀酒趙釋爵擁路作禮望塵瞻顏師必款曲以情悅可其
意捨資財以攝其利言力役以勤其生漸去客塵令入佛
智有苛吏敗俗蠹政虐人伏以剛強示之簡易見方便力

去貢高心破其重昏歸以實相夫學偏者量徧道廣者業
宏禪師智括有情德通無礙體含虛韻性有異能妙窮音
律雅好圖畫季長公瑾別有新聲凱之僧繇皆得真跡以
是好事君子翕然向風檀爲施心居無長物有流離道路
羈旅風霜鄉隔山川親無強近饑者推之以食寒者解之
以衣人中之急難法中之慈濟也景龍三年敕追與僧元
散同爲翻譯大德累表懇請詔許還山禪師自居此寺凡
六十年或宴坐林中累日忘返或經行巖下踰月不還跡
異人閒行標物表每遊峯選勝建塔崇功驚若飛來鴈如

踊出官窯杖標之所得自神人破塢移燈之處傳諸耆老
今山上數十處有窰堵波者卽其事也自金人入夢白馬
員來譯音議於天竺布文字於震旦是爲教本實曰道因
禪師遍寫藏經以導學者德實無量行非有涯不惟總持
辯才禪定智惠而已故騰聲洛下獨步鄴中齊達叡之大
名繼稠融之遐躅噫日月大地咸歸有盡之源河海高山
不出無常之境天寶五載十二月十日因閱僧務詣至德
里回首西方端坐如定不疾而化春秋九十餘僧臘七十
一日黑震驚車徒奔集雷慟雨泣隘谷填山粵以其月十

七日遷靈坐於本寺禪師真身忽然流汗是知因生有滅
乃現真空示聖出凡獨標靈相以八載二月十五日卽身
塔於寺之西北隅以安神也其夜霜霰霑凝山川草木皓
然如素東帶雲門西連硤谷一佛二佛前身後身接林嶺
之風煙成鄴衛之松柏禪師洞合神契妙通法源義則解
空智能藏往先是寺中新植眾果弱未成林悉令沙彌扶
之以杖其夜大雪折樹摧枯唯時小枝不動如故師之冥
感多此類也門人等味道通經連州跨境歸宗雖倍入法
益稀三千門徒皆傳經於闕里四百弟子空問道於襄陽

弟子大通親奉音塵常陪庭院承宮之歲初執勞以求師
智稱之年載棄俗而從道調九候以除五疾明六度以伏
四魔感自舊恩錄憑故事龕塔山古霜露歲深虎溪爲陵
高蹤不亡於別傳龍山若礪盛德長存乎此詞其銘曰

執有非有觀相非相日離諸妄得法捨法悟空非空是出
羣蒙日景常朗雲藏其耀無雲自照佛性常在欲生其塵
無欲爲真無相捨有出空離法大師宏業觀日除雲無欲
歸佛大師祕密茫茫羣有溺於中流濟之以舟冉冉八苦
沒於五濁導之以覺因心發惠惠契於定道澄其性憑緣

有生生歸於無理不存軀恒沙一劫藏舟閱水真身去矣
連崗萬古雲門靈泉飛塔歸然

華陽三洞景昭大法師碑

夫載宇宙懸日月提萬象而首出者其惟道乎夫通聖神
該品彙冠百靈而獨立者其惟人乎道所以包渾元經始
萬象者也人所以稟淳粹司會百靈者也故人因道而集
祉道因人而垂休不宰之功兆乎造物無言之德洽乎生
民然後蕭散乎汗漫之間沖融乎希夷之表與天籟而吹
萬並谷神而長存者矣紫陽真人大法師諱景昭字懷寶

本丹陽延陵人也其先系自顓頊大彭之後在虞爲陶唐氏在夏爲御龍氏在商爲豕韋氏因國命氏芬馥蔓延以至於裔孫孟孟爲楚太傅賢爲漢丞相昭入吳爲侍中昭兄慎爲司空法師卽吳司空之十六代孫也司空薨葬於延陵子孫因而家焉祖道會父思歲皆邱園養素道高跡隱載於列仙之籍法師方娠稟異自幼表奇孕元和之粹靈體太元之妙質初以素書發跡配度於延陵之尋仙觀後以丹臺著稱隸居於長安之肅明觀屬元宗廣成問道姑射頤神放心於凝寂之場垂拱於穆清之上法師因得

羽儀金籙頡頏玉繩藉藉京師垂二十載爰辭上國思還故鄉重隸茅山之太平觀天寶中與元靜先生奉詔修功德造紫陽觀因而居焉遂於鍊丹院傳黃素之方修齋醮之法祥雲瑞鶴飛舞於壇場甘露神芝降生於庭院初法師師事大法師包士榮榮師事崇元觀道士包法整整師事上士包方廣廣師事華陽觀道士王軌軌師事昇元先生王遠知知師事華陽隱居陶宏景自道源錫派元教傳宗玉堂銀闕之人羽蓋毛旌之客府無虛籍代有其徒法師至行稽乎元化通識合於靈造與其有也萬物不得而

不有與其無也萬物不得不無得喪以春秋爲死生盈虛以天地爲旦暮雲外虎頭之佩雪中鶴氅之裘孩季通而撫子元師仇公而祖黃太教戒示乎傳授服餌見乎延長侍杖屨者跡徧於江湖傳經籙者事同乎洙泗一居山觀三紀於茲還神契乎時來寂魄同乎物故以貞元元年十一月癸卯委蛻於紫陽之道場顏色怡悅屈伸如常春秋九十有二以其月己酉遷神於雷平山之西原元靜先生壽宮之左傳授蘇州龍興觀道士皋洞虛得沖虛之妙用躡上真之元蹤梁市之客員來華陽之人閒出矣道士

韋崇珣主修齋醮祭俯仰節度道士朱惠明掌法錄經書
修真祕訣法師上編仙籙旁契道樞神含混元德與淳粹
誘進羣動感通衆靈邈然非寰宇之閒超然在風雲之表
至如身纏世故跡混俗塵發忠孝以飾躬演信義而旌行
蓋隨時而不器豈常道之可師與浙江東西節度支度判
官檢校尚書兵部郎中兼侍御史扶風竇公曰泉布武區
中棲心象外與法師聲同道韻理契德源追往想琴高之
祠傳神著務光之傳見徵副墨用琢他山其詞曰
惟道之大提功混茫惟人殆庶與道迴翔素韻凝寂元功

靈長肇形無迹啟迪逾光矯矯法師錫羨華陽本族命世
在虞系唐御龍事夏豕韋居商嶷然靈表自幼而彰理冠
容成質侔夏黃尋仙發跡肅明始揚宵禮金殿晨朝玉皇
丹臺道侶白雲帝鄉楚山萬里故國丹陽醮宮鳴磬齋室
焚香芝生庭院鶴舞壇場茅君祕洞葛氏真方來時去順
齊彭洎殤化鱗風翦委蛻雲驤峯巒邈迤松桂蒼蒼塵生
杖履苔染巾箱龍銜彩眊虎綴槃囊閭風元圃瑤軒玉堂
追存如在頌德不亡孤石巋然萬古連岡

太平觀道士徐元沼道士許長

久徐則內行克修外通儒學許則宿推公幹虔奉真宗

戴叔倫

叔倫字幼公潤州金壇人釋褐祕書省正字累官祠部郎中拜撫州刺史封譙縣男遷容管經畧使貞元五年卒年五十八

賀平賊赦表

臣某言伏奉某月日制書大赦天下雪滌痕累發生枯朽榮光被於草木和氣貫於華夷含生之徒罔不胥悅臣聞氛沴爲妖蒙蔽二曜而祥風埽蕩無損日月之光狂逆亂常震驚四海而元功勘定不虧天地之大伏惟皇帝陛下

文武繼聖聰明在躬協堯舜之心崇禹湯之德清廟禮展
園丘敬申猶願已以求瑕布恩澤以原過康哉沛乎虞夏
之盛典也臣忝職藩條實慙尸曠徒積歲星蔑聞化理望
九重而稱慶齒百辟以霑恩瞻戀闕庭慶快之至

意林序

三聖相師大易光著天地之功立矣經傳之功生焉輔成
一德謂之六學漢收秦業其道方興置講習訓授之官明
君臣父子之體雖禮樂文闕亦足以新忠孝仁義之大綱
至如曾孔荀孟之述其

闕一字

蓋數百千家皆發揮隱微羽

翼風教祖儒尊道持法正名縱橫立權變通其要崇儉而有別卽農而有序旁行而不流小說去泥而篇簡繁夥罕備於士大夫之家有梁潁川庾仲容畧其要會爲子書抄三十卷將以廣搜採異而立言之本或不求全大理評事扶風馬總元會家有子史幼而集錄探其旨趣意必有歸遂增損庾書詳擇前體裁成三軸目曰意林上以防守教之失中以補比事之闕下以佐屬文之緒有疏通廣博潔淨符信之要無僻放拘刻譏蔽邪盪之患君子曰以少爲貴者其是之謂乎余元會之執友故序而記之貞元二年

五月二十一日也

李方郁

方郁建中時官洛陽令

修中嶽廟記

上四年用大司計侍郎爲丞相其明年以我相秉樞機我公掌綸誥宜爲避嫌遂自閣下拜河南尹將辭上悄然謂公曰前時洛水爲災洛民大潰四走無逃至有沒死者豈勝其冤耶而公今去我無東顧之患矣公旣至理事先以恤民爲寄活生瘞死大開廩庾賑貧乏飽饑腸暖寒體極

於畿甸靡不周悉而又蠲逋租省徭賦俾安穩其起居勤
強其事業故遠邇之民相賀而歌曰天災流行兮代有下
民昏墊兮時數命無以逃兮諒自嗟豈將天怒我尹之慰
恤兮實解予之愁苦夫得耕兮婦得織日出得作今日入
得息此固我君之憂民兮俾我尹之來卽又歌曰明明在
上兮天子聖四方取則兮我公令疲民蘇息兮公之政一
日將去兮誰活我之性命其都之南嵩嶽橫亘其嶽有廟
距都百里每歲季夏日直土用御置祝文用犧牲粢盛醴
齊庶品詔我公有事於王禮既公周視廟宇堂殿廊廡見

其崩墜圯毀剝癬頽墮垣墉漫靡榱棟失次梁柱差欹顧
謂其邑令李方郁曰吾聞大地列岳五嵩山居其一其嶽
峙中天羣峯蒼翠異色其岡巒重疊異狀其出雲霞黀異
氣其草木森聳異岵其葩卉薈翳異香其禽鳥閒關異聽
其溪澗灑潏異流若此之狀觸目周匝四時迭觀吞吐氣
象環一山之上道宮佛寺高閣危樓盡萃其中我國家以
神之靈塑神之形俾神之明福我蒼生我我其冠整整其
衣兵仗駢列羽衛參差天子以時視三公禮而祀之要神
之德既厚矣報神之功亦重矣所宜威壯形容華煥宮宇

奈何以危毀至是俾爾民之進拜禱祝將何瞻仰乎我今
出府庫十萬資以功用爾宜專其事俾爾心與吾心不可
以異方郁謹再拜受命退而自言曰方郁爲吏稟指使上
不敢罔公中不可欺神下不能苦民豈可不成耶遂鳩工
庀材四旬而就見若赤白之交映矣見若金碧之分輝矣
見若棖桷之紛繪矣見若斗拱之光赫矣見若簷溜之轟
截矣見若溝壟之端隆矣見若戶牖之照燭矣見若垣墉
之齊削矣旭日明媚夾壇殿之飛翬朝霞卷舒助峯巒之
起秀則知公之措制可以邁古冠今使海內神廟修潔崇

盛無逾於中嶽公天發晶朗嶽鍾秀粹羣妙符識萬頃澄
襟瓊樹冰壺涵澈於神宇黃鐘朱瑟鏗奏於文章况公尹
正之能撫民之美愚知其不日而將與吾相連枝於台座
之中致美於廟堂之內將吾君岌立於堯舜之上措吾民
登壽於邃古之際必矣方郁忝官在縣行及秩滿特蒙公
錄以微績上表量留付之修飾輒敢敘德紀事刻石以記